

Otorgamento di Passaat Awards na Arubiano y Antiyano cu a destaca den diferente ramo

STA. CRUZ/Den Haag – Recientemente den sala monumental di Staal na Rotterdam a tuma lugar otorgamento pa di cuatro aña consecutivo di e Passaat Awards na Arubiano y Antiyano cu a destaca den diferente ramo. Passaat ta un organizacion pa studiantenan Antiyano y Arubano na Universidad Erasmus di Rotterdam y studiantenan na otro institutonan di enseñanza avanza den region di Rotterdam. E anochi a conta cu presencia di Minister Plenipotenciario, sr. Frido Croes y señora Lourdes Croes-Figaroa, sra. Mavis Brooks-Salomon di Antillenhuis, miembro di Tweede Kamer sr. Leerdam y sra. Leerdam-Bulo. E tema di e anochi aki tabata “It’s your time to shine”. Esaki a wordo presenta na yegada ora tur invitado a sinti

nan mes riba “red carpet” di Hollywood. Maestra di ceremonia di e anochi aki tabata sra. Annette Bernadina y maestro di ceremonia tabata den man di sr. Sonsito Croes. E prome nominado cu a haya un Passaat Awards durante e anochi aki tabata sra. Vicky Trinidad, cu a ricibi su premio den e categoria di Social/Cultural. Despues sr. Vurnon Anita a ricibi su premio den e categoria Deportivo, pa su exito den e deporte di futbol como hungador di AFC AJAX. Nos talento Arubano, sr. Juvani Richardson, conoci di entre otro e musical Fame, a haya e awards e anochi aki den e categoria di “Media y Entertainment”. E award den e categoria Ciencia a bay pa sra. Zayenne van Heesen-Lacle. Sra. van Heesen-Lacle a haya e reconocimiento aki

pasobra e ta e promovendus Arubano di mas hoben. Den categoria Empresarial e premiacion a bay pa sr. Ramsay Soemanta. Y e artista Ziggy a ricibi esaki den categoria di Musica. Den e categoria Ciudadano Excelente, sra. Tanya Jadnanansing a logra bay cu premio. Sra. Jadnanansing ta advisor pa e programa NOS Headlines y ta presentadora na MTNL. E secretaria di Passaat, sra. Thalicia Lieuw-sjong a duna un discurso y a enfoca ariba e historia di Passaat y tambe ariba su experiencia di e ultimo aña. Despues di e parti aki tesorero di Passaat sra. Elizabeth de Cuba y comisario externo sr. Royston Paulina a entrega e award pa e “Most Valuable Voluntario” y “Most Valuable Miembro di Comision” na respectivamente sr. Ginnovar Cannister y sra. Chantal de

Haseth. Sra. Mavis Albertina a ricibi un “Lifetime Achievement Award”, pa motibo cu sra. Albertina tin mas di 30 aña di experiencia den e ramo di comunicacion. Sra. Albertina ta hopi conoci na diferente pais, como cu e ta presentadora di su mes programa na television. Tambe e tin su mes revista riba Mercado y semper e ta wordo puntra pa ta moderador den diferente panel.

Na final comisario interno di Passaat, sra. Darrlyn Maduro, a gradici tur persona pa nan presencia na e anochi aki y principalmente un palabra di danki a bay na Minister Plenipotenciario, sr. Frido Croes. Passaat por mira atras ariba un anochi hopi exitoso y a clausura e evento cu celebracion di e di 11 aniversario di Passaat ariba tononan musical di Passaat Band conhuntamente cu sra. Margie Martinus y DJ Zoontje.



MADURO'S CAR WASH


Situa na Rowigini's Plaza!

Tel : 5629000

Ta duna servicio di polish, undercoat, laba sienta y tapijt, laba motor y mucho mas.

Orario: 9'or am - 5:30pm

Trece e aviso aki y ricibi 15% ariba un laba di auto completo



Directiva di SIMAR ta yama tur miembro/pensionado pa un Reunion General:

- Fecha: Diaranson prome di (1) october.
- Ora: 19:30'or
- Lugar: Sede di SIMAR

AGENDA: 1- Apertura.
2- Participacion.
3- Posicion directiva pa cu e mocion di desconfiansa.
4- Splicacion di miembronan preocupa.
5- Preguntan aclaratorio di sala.
6- Votacion pro of contra mocion di desconfiansa.
7- Clausura.

BO PRESENCIA Y OPINION TA IMPORTANTE PA FUTURO DIBO Y DI SIMAR.

Si no tin quorum pa e reunion, directiva, ta sera e reunion y ta habri un otro reunion pa diaranson 1 di october 19:45'or. Den e reunion aki desicionnan valido por wordo tuma irrespecto e cantidad di miembro presente.

Atentamente,
Hugo van Varsseveld, presidente di SIMAR